

# YUDE

## Hun Kat é Laiká (Jude)

<sup>1</sup> Yesuq Hkrisduq é dui-nhâng zoshâng nghut sû eq Yakuq é yhanggu, ngò Yude gi, haû Íwa Garai Gasâng èq jí yù mù, chyitdap é hui luî, Yesuq Hkrisduq èq upzúng é hui bâng chyâng dang kyô kat lhê.

<sup>2</sup> Shogyo nhikmyin hkyô, ngingón hkyô eq chyitdap hkyô gi, nungmoq chyâng agùn agó joq nyì shâng gaq ô!

### *Garai A Wó Bâng É Yubak Mara*

<sup>3</sup> Chyitdap é luzûm wuî ê, ngò gi, nga-nhûng chôm wó é hkyi yù hkyô haû eq séng luî, nungmoq lé gyai yhang kâ kat byí nau é nghut lhê wá, haû sân-yûng bang lé, radá dâm jâng ap byî to bê nghut é lumjíng hkyo é matú nungmoq htuq htíng râ dut é lé, myit wum byi râ hkyô ká râ dut é lé, ngò byu-myang ri. <sup>4</sup> Hkâsu mù gâ le, haû mara dam byî é hui zo râ hkyô lé, a-nham pyat mai kâ matsîng tô é hui bê bang ra-am gi, nungmoq chyâng hkaû wang lò bekô nghut ri. Yhangmoq gi, Garai a wó é bang nghut luî, haû nga-nhûng é Garai Gasâng jeju lé, mingkan ngón hkyo èq htaî lhik pyám kô é htoq agó, Yhang za nga-nhûng é Yhumsîng nghut sû eq Ahko ahkâng lhunghâng wó sû, Yesuq Hkrisduq lé he-ngik pyâm akô nghut ri.

<sup>5</sup> Nungmoq kûm gi, shí pé banshoq lé sê to gù nghut kôlhang, ngò mai nungmoq lé taî pún nau é

hkyô gi, a-ô mâ é pé nghut lhê: Haû gi, Yhumsîng Garai mai, Yhâng é byu pé lé, Egutuq ming mai hkyi htoq yû kôlhang, a lumjíng é bâng lé gi, htâng má dum lhoq htên pyâm é nghut lhê. <sup>6</sup> Hau htoq agó, haû yhumsing é ayá lé tô pyám luî, yhumsing é nyì jowò lé pyâm tô é maumâng pé lé, Yhang gi, haû tarâ jéyâng é hui râ Buinyì mó je shoq, ahtum abyuq é toqjâng tuî èq tui luî, mauchut hkaû má lhûng tô é nghut lhê. <sup>7</sup> Haû eq rajung za, Sodom eq Gomoraq myuq eq hau é awui ayàm mâ é wà pé mâ é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyì zô lhûm é hkyô kut kô é nghut mù, yhangmoq gi, ahtum abyuq é myi má dam byî é hpuzo bâng é alik dut bekô nghut ri.

<sup>8</sup> Haû eq rajung za yhang, yhupmoq moq é byù shí bang gi, yhumsing é gungsho lé agot a-û kut kômù, ahkâng ayá wó sû lé he-ngik pyám kôluî, mauhkûng bang lé lumù gansang akô nghut ri. <sup>9</sup> Nghut kôlhang, haû maumang lagyo agyì Mihkaelaq Ihâng gi, Mosheq é gùng eq séng luî, haû nat zau eq dang rhâng lhûm é hkûn, yhang lé rhoi é dông mara hûn dang a wám taî é za, "Nang lé, haû Yhumsîng nhik-yo shâng gaq!" ga za taî ri. <sup>10</sup> Nghut kôlhang, byù haú bang gi, yhangmoq a sê gyô é hkyô pé lé rhoi dang taî pyâm akô nghut ri; yhangmoq gi, haû myit woi-nyí a bo é dusak pé su, yhumsing myit mai sê gyô é hkyô pé má lhâng, yhumsing gùng lé lhoq htên yu akô nghut ri.

<sup>11</sup> Yhangmoq gi, dingnyé wó râ! Hkâsu mù gâ le, yhangmoq gi, Ka-in\* kut é agè ashop é hkyô dông

---

\* **1:11** Ka-in gi, yhanggu lé sat sû nghut lhê. Apûn 4:1-8

cháng kô é yanmai le, akyû wó râ matú, Balam† shut é dông bo shut kô é yanmai le, Kora‡ é gumlau toq hkyô kut kômù, yhang su htêñ byoq byuq é hui kô é yanmai le nghut ri.

<sup>12</sup> Yhangmoq gi, nungmoq é chyitdap zoshuq poî má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkûn, yhumsing gùng lé za yhumsîng lhoq gyî yu é sau zúng bang nghut akô; yhangmoq gi, lai èq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpûn pyám luî, í dâm shi é, xung nám lhê é sikgâm pé su nghut akô. <sup>13</sup> Yhangmoq gi, yhumsing é hoq jung lé, tsû-myup su htoq nhang é, haû wuimau mâ é kô é wuîlhêng pé eq, tuq tuq chut é mauchut hkaû má tarâ jéyâng hui râ matú, ahtum abyuq tô to huî é, yông wún é kyî pé su nghut akô.

<sup>14</sup> Byù haú bang eq séng luî, Adam mai byùxik nyhit xik má nyi é Enuk, myiqhtoi htoi tô é gi, "Wú keq, haû Yhumsîng gi, Yhâng é chyoiyûng bang mun mun sen sen eq rahá gyó lé lo nyì bê nghut ri.

<sup>15</sup> Yhang gyó lé lo é gi, yuq hkangmó lé tarâ jéyâng râ matú eq, haû tarâ a hkunggâ é lhunghâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taî shut é dang htân pé banshoq lé le, mara byi râ matú nghut lhê." gâ ri. <sup>16</sup> Byù haú bang gi, put dang taî

---

† **1:11** Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sû nghut lhê. Gyung So 22:1-35 ‡ **1:11** Kora gi, Garaî byù nghut é hkyô-u shê sû Mosheq lé gumlau toq é hkyangjong nghut lhê. Gyung So 16:1-33

é bang eq mara hûn dang taî é bang nghut akô; yhangmoq gi, yhumsîng ô nau é agè ashop hkyô châng kô é htoq agó, yhumsing gùng yhumsîng nghutbûn é dang taî é eq yhumsing maiwâng zat é dông, góbang lé owaq é bang nghut akô.

### *Hkam Jân Râ Hkyô*

<sup>17</sup> Nghut kôlhang, ngò chyitdap é luzúm wuî ê, nungmoq gi, haû nga-nhûng é Yhumsîng Yesuq Hkrisduq é lagyô pé mai te taî tô é dang lé, bûn nyì keq. <sup>18</sup> Hkâsu mù gâ le, yhangmoq gi, "Haû ló htâng é ahkyíng pé má, tarâ a hkunggâ é yhumsîng ô nau é hkyô dông châng é, rhoijap-dap dang taî é byu pé nyi to râ nghut lhê." ga, nungmoq lé taî wú kô é nghut lhê. <sup>19</sup> Byù haú bang gi, nungmoq lé gam hkoq é bang, mingkan hkyô lé baú za châng é bang, haû Woi-nyí a bo é bang nghut akô.

<sup>20</sup> Nghut kôlhang, ngò chyitdap é luzúm wuî ê, nungmoq gi, haû Chyoiyûng Woi-nyí má kyûdûng é dông, nungmoq é chyoiyûng é lumjíng hkyô má, yhumsing gùng yhumsîng lhoq kô yu nyì keq. <sup>21</sup> Ahtum abyuq é asak lé wó yû râ matú, haû nga-nhûng é Yhumsîng Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsîng nyi nyì keq.

<sup>22</sup> Lumjíng hkyô má úng-âng é bang lé, shogyo nhikmyin nyì keq; <sup>23</sup> góbang lé gi, myi mai she htoq yû mù, hkyi yû keq; dum, góbang lé gi, sidiq myit èq shogyo nhikmyin hkyô tûn shit mù, haû gungshô é achaq achyut dap é yhangmoq é mebu lé chaq nyî keq.

*Hkya-on Kungtôn Dang*

<sup>24-25</sup> Nungmoq lé, a lingbat shoq wó upzúng luî, nungmoq lé, mara hûn râ hkyô a bo é za, gabú dik é dông mai Yhang é hpungwup shingkang bo é myoq hí má wó shuî shit é, nga-nhûng é hkyi yù Sû, rayuq za nghut é Garai Gasâng chyâng, hpungwup shingkang, hkikhkam hkyô, hpungwup a-tsam eq ahkâng ayá gi, nga-nhûng é Yhumsîng Yesuq Hkris-duq dông mai, laî lò bê ipyat pé má le, ahkuí pyat má le, pyat dedu ahtum abyuq má le, rujoq nyî shâng gaq ô! Amen.

# **Chyoiyúng chyumlaiká: dangshikaq asik; Zaiwa New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

## **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

## **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files

dated 29 Jan 2022

23f9fc55-a8a4-59ef-9513-707ec336b0ee